# Scots Languages Bill

# Policy Memorandum

### Introduction

- 1. As required unner Rule 9.3.3 o the Pairliament's Staunin Orders, this Policy Memorandum is furthset tae gang with Scots Languages Bill introduced in the Scots Pairliament on 29 November 2023.
- 2. The follaein ither documents that gang alang wi the Scots Languages Bill are furthset on their ain:
- Explanatory Notes (SP Bill 39–EN);
- a Financial Memorandum (SP Bill 39–FM);
- a Delegatit Pouers Memorandum (SP Bill 39–DPM);
- statements on legislative competence by the Presidin Officer and the Scots Government (SP Bill 39–LC).
- 3. This Policy Memorandum has been devised by the Scots Government tae set oot the Government's policy ahint the Bill. It daesnae form pairt o the Bill and hasnae been endorsed by the Pairliament.

# Policy objectives o the Bill

4. The policy objective o this Bill is tae gie mair support for Scotland's hamelt leids, Gaelic and Scots. Its provisions tak their lead frae Scots Government manifesto commitments and mak statements aboot the status o Gaelic and Scots. Tho the provisions o this Bill tak their lead frae Scots Government commitments, the Bill seeks forby tae respond tae the wish plainly pit forrit in the Gaelic and Scots communities for mair support tae be pit in place for thir leids. Thon has been kythed in formal consultation responses but forby in ilkaday engagement wi Gaelic and Scots representatives and interests.

- 5. The Bill will forder the uphaudin and promotion o Gaelic and Scots by bringin in a hantle o meisures that will hae implications in a nummer o sectors in Scots public life. The provisions o this Bill big upon current policy priorities that are in place the noo wi the aim o makkin the new package o meisures mair efficient for the progress that is needit for Gaelic and Scots. The Bill will include a duty on Scots Ministers tae devise a Gaelic leid strategy and a pouer tae devise staunards for public authority ongauns, includin Gaelic education. As is the case the noo, it will be necessar for Scots public authorities tae come up wi a Gaelic leid plan and in future thir plans will tak their lead frae the strategy and staunards. The Bill will bring in the possibility o areas o muckle linguistic mense tae allou for proportionate delivery. Bòrd na Gàidhlig will hae a vital role in thir new provisions but wi a mair muckle focus on baith delivery at a community level and reportin on compliance for the abuin.
- 6. The Bill will include a duty on Scots Ministers tae devise a leid strategy for Scots and tae devise secondary legislation on Scots. This is the first time that Scots has featured in legislation and the Bill provisions will include a statement about the status o the Scots leid. This is a lang-staunin wish o the spikker community. Statements on the status o Scots hae aft been makkit in non-legal documents and in ministerial statements but no in legislation. Scots has been taen tent o in the Cooncil o Europe's Charter for Regional and Minority Leids and in proceedins o the British-Irish Cooncil. Forby thon, the Bill will include ither important provisions tae promote the uise and recognition o Scots in public and community life.
- 7. The provisions o this Bill will kythe continuity wi the meisures that are awready in place. The aim is tae mak the new package o meisures mair effective for the progress that is needit for Gaelic and Scots. Whaur the Bill maks statements on official recognition for Gaelic, it is biggin upon current status statements in the Gaelic Language (Scotland) Act, 2005. Scots Ministers will devise a Gaelic leid strategy that will tak the place o the Bòrd na Gàidhlig duty tae devise a National Gaelic Leid Plan. Scots Ministers will devise Gaelic leid staunards that will tak the place o the Bòrd na Gàidhlig duty tae devise guidance.
- 8. It will noo be necessar for Scots public authorities tae tak tent o the Gaelic leid strategy and Gaelic leid staunards in devisin their Gaelic leid plans raither than guidance on Gaelic leid plans. Bòrd na Gàidhlig will report tae the Scots Pairliament and tae the Scots Ministers on Gaelic leid plan compliance and this will gang alang with the current Bòrd na Gàidhlig monitorin regime. Scots Ministers will devise a Scots strategy that will be uphaudit by provisions for guidance and staunards for Scots leid education. Thir will tak the place o the current Scots Government Scots policy.

# Backgroond

9. The establishment of the Scots Pairliament in 1999 mairked a turnin pynt in uphaudin for Scotland's leids. Thon year, the Scots Executive pit thegither a taskforce on the public fundin o Gaelic. Its findins, kent as the MacPherson Report, set furth that:

"The bottom line for Gaelic is that, in a new Scotland, the survival and revival o a national asset is shuirly desirable and possible. It's time for revitalisation. It's time for a chynge in paradigm."

This was follaed in 2002 by the settin oot o a Ministerial Advisory Group on Gaelic that recommendit that:

"a pre-election pledge be socht frae aw pairties tae bring aboot a Gaelic Language Act athin 3 years... A Gaelic Act should haud up future Gaelic leid strategies."

This was brung aboot wi the Gaelic Language (Scotland) Act 2005 (the "2005 Act"). In the years syne, uphaudin for Gaelic in Scotland's schuils has been fordered by the Schuil Consultation (Scotland) Act 2010 and in the Education (Scotland) Act 2016 (the "2016 Act"). Mair forderin forrit can be seen in the wark o MG ALBA, Sabhal Mòr Ostaig and the wark o a nummer o Gaelic bodies. For Gaelic this progress will be fordered and biggit upon wi the provisions o this Bill and for the first time there will be legislative provision as regairds tae Scots.

- 10. The Scots Government made a nummer o manifesto commitments tae the Gaelic and Scots leids in 2021. Amang thir are fower that can be thocht o as heidmaist commitments. Thir are tae set in place a new strategic approach tae Gaelic medium education, tae luik intae the makkin o a Gàidhealtachd, tae review the structure and wirkins o Bòrd na Gàidhlig (BnG) and tae tak action on the Scots leid.
- 11. The Scots Government consultit on thir commitments atween August 2022 and December 2022. Ower 750 responses were received. The responses and analysis<sup>1</sup> o the consultation were furthset in June 2023. The provisions o the Bill tak account o the consultation responses as set oot in mair detail ablow.

### Pairt 1: Gaelic

### Chapter 1: Uphaudin o the Gaelic Leid

### Status o the Gaelic leid

12. The 2005 Act formed Bòrd na Gàidhlig as "a body haein wirkins tae be makkit uise o wi a view tae makkin siccar o the status o the Gaelic leid as an official leid o Scotland cawin for equal respect tae the English leid". This provision o the Bill seeks tae tak tent o Gaelic as haein official status athin Scotland. Official status will be kythed by the success o Bòrd na Gàidhlig in securin Gaelic's position across Scotland's public life in the years syne the 2005 Act was passed. It wad tak tent forby o the wark duin by mony ither public bodies athin their Gaelic leid plans taewards makkin siccar o this aim. Mairower, official status is a provision that will uphaud the

<sup>&</sup>lt;sup>1</sup> Scots Languages Bill, Consultation Analysis - <a href="https://www.gov.scot/publications/analysis-consultation-responses-gaelic-scots-commitments-relative-scottish-languages-bill/documents/">https://www.gov.scot/publications/analysis-consultation-responses-gaelic-scots-commitments-relative-scottish-languages-bill/documents/</a> Scots Languages Bill, Consultation, Published responses - <a href="https://consult.gov.scot/education-reform/gaelic-and-scots-scottish-languages-bill/">https://consult.gov.scot/education-reform/gaelic-and-scots-scottish-languages-bill/</a>

confidence o the spikker community and gie mair wecht tae future ettles on behauf o Gaelic.

### Wirkins o Bòrd na Gàidhlig

13. Bòrd na Gàidhlig is a non-departmental public body fundit by the Scots Government tae uphaud the promotion o Gaelic. Through the Bill, it will be necessar for Bòrd na Gàidhlig tae furthset reports on compliance by public bodies wi the Gaelic leid strategy and staunards for Gaelic. Whit is chyngin is the focus o its work sae that it is luikin at practice athort the public sector. It will be able tae report straicht tae Pairliament raither than anely through Scots Ministers. Thir meisures and the fact o its bein able tae furthset reports will mak mair o its vyce and leverage, makkin its messages mair strang and mair uisefu. Section 2 o the Bill chynges the wirkins o Bòrd na Gàidhlig.

### Bòrd na Gàidhlig corporate plan

- 14. This section introduces a statutory requirement for Bòrd na Gàidhlig tae hae a corporate plan. The noo, Bòrd na Gàidhlig pits oot baith the National Gaelic Leid Plan and its ain Corporate Plan. Unner Section 5, the Gaelic leid strategy devised by Scots Ministers will ower time tak ower frae the National Gaelic Leid Plan. Frae this pynt forrit, Bòrd na Gàidhlig's Corporate Plan will set oot how the Bòrd maks uise o its wirkins tae inpit tae the delivery o the Scots Ministers' Gaelic leid strategy. This will heeze up the status o the Gaelic leid strategy document while at the same time makkin siccar that Bòrd na Gàidhlig's role is plain in inpittin tae the Gaelic leid strategy and that this is set oot in the corporate plan.
- 15. Section 4 o the Bill chynges schedule 1 o the 2005 Act tae mak it neccesar for Bòrd na Gàidhlig tae devise a corporate plan and submit this tae the Scots Ministers for approval.

### Areas o Muckle Linguistic Mense

- 16. The Bill will introduce areas o muckle linguistic mense. An area micht be cried sic if it has a hantle o fowk wi Gaelic leid skills, is historically connectit wi the uise o Gaelic, has Gaelic educational provision or has a guid amoont o Gaelic ongauns. It will be for the local authorities tae think aboot their communities and tae decide whit anes they want tae be cried areas o muckle linguistic mense. This provision is vital for kythin that steps will be taen in areas that hae a guid nummer o Gaelic spikkers while at the same time taken tent o the fact that Gaelic should be uphaudit throughoot Scotland. Baith messages were plainly pit in consultation.
- 17. A nummer o pilot initiatives are in place, in areas sic as Staffin and South Uist, whaur groups in local areas are wirkin thegither wi the uphaudin o Bòrd na Gàidhlig tae set oot their leid plannin needs and strategy for their local areas. Thir are local community initiatives that will gree upon a set o Gaelic meisures for the area. Thir initiatives will aye be uphaudit by BnG as they are noo. This provision described abuin will contribute tae and mak siccar o thir local initiatives.

18. The local authority maun speir at interestit fowk and mak public the proposed cryin o an area afore pittin it forrit tae the Scots Ministers for approval. A cryin micht be chynged or revoked, wi sic chynge or revocation bein subject tae the same process o consultation, publication and submission for approval. The Scots Ministers micht gie guidance tae local authorities relatin tae their wirkins unner this section and a local authority maun tak tent o sic guidance. A relevant public authority maun set oot the meisures tae be taen in relation tae the exercise o its wirkins in an area o muckle linguistic mense in its Gaelic leid plan.

### Gaelic leid strategy

19. It will be necessar for the Scots Ministers tae devise and consult upon a Gaelic leid strategy. The Gaelic leid strategy will tak the place o the five-year National Gaelic Leid Plan devised by Bòrd na Gàidhlig the noo. Sae as tae forder forrit wi Gaelic it is necessar that there is a greed upon set o priorities for the leid and that the provision o a Gaelic leid strategy will be gied greater status by bein gied oot straicht frae Ministers.

#### Gaelic leid staunards

20. The Bill maks provision for Scots Ministers tae hae a pouer tae set staunards for Gaelic in regulations. The intendit uise o the staunards pouers in the initial period o the cairryin oot o the Bill will be tae shift content and requirements that hae kythed in statutory guidance and Gaelic leid plans intae regulations. This will siccar base line requirements that the Scots Administration will hae tae comply wi and will mak shuir that staunards are aye kept tae. The three elements o Gaelic leid strategy, staundarts and Gaelic leid plans will wirk thegither tae mak siccar o progress and consistency in the promotion o Gaelic in Scotland.

### Duties o relevant public authorities

21. Unner the Bill, it will be necessar for relevant public authorities tae tak tent o the value o promotin and uphaudin the uise o the Gaelic leid in makkin uise o their wirkins. Scots Ministers will hae a pouer tae gie guidance tae relevant public authorities relatin tae their duty tae Gaelic and Scots Ministers will hae a pouer forby tae gie directions. A mair eident approach is necessar for the promotion and uphaudin o Gaelic. This provision will big upon the achievements o institutional Gaelic leid plans syne the 2005 Act. Guidance and directions frae the level o Scots Ministers will mak siccar thir duties hae mair authority.

### Reportin on Gaelic leid strategy, staunards and duties

22. The Bill maks it necessar for Bòrd na Gàidhlig tae devise and furthset reports aboot the Scots Ministers' progress taewards raxin the objectives in the Gaelic leid strategy, and the compliance by relevant public authorities (either oweraw or in particulars) wi their duty tae tak tent o the Gaelic leid strategy and tae comply wi staunards and requirements set oot in regulations, and tae furthset and pit thir reports afore the Scots Pairliament. This reportin requirement will encourage Bòrd na

Gàidhlig tae hielicht guid practice and share examples o forderin forrit alang wi pyntin oot areas that need takkin tent o and suggestin whit actions micht be thocht aboot tae address gaps.

### Gaelic leid plans

- 23. The Bill maks sindry chynges tae section 3 o the 2005 Act on Gaelic leid plans sic as takkin account o the new Gaelic leid strategy. The direction-makkin pouer is a vital lever in the structure oweraw. It wad, houaniver, be intendit tae be uised infrequently and as a last resort.
- 24. A Gaelic leid strategy will be introduced in place o the current National Gaelic Leid Plan. This maks possible the wantit shift in authorship frae Bòrd na Gàidhlig tae the Scots Ministers. As sic, the framewark the Gaelic leid plans o sindry public bodies are devised athin will be ane that comes frae the level o Scots Ministers. Scotland's public bodies will sicweys be respondin tae a national leid strategy devised by Scots Ministers and uphaudit faurer by a duty on Scots Ministers tae promote and forder Gaelic education.
- 25. This provision maks ane chynge forby tae section 6 o the 2005 Act regairdin the monitorin o Gaelic leid plan implementation. Athin the system the noo, annual monitorin reports on Gaelic leid plans are submittit follaein a formal request tae a public body by Bòrd na Gàidhlig. Unner this provision, it will be necessar for public bodies tae eidently report tae Bòrd na Gàidhlig on the cairryin oot o their plans. The desired effect o this is tae mak siccar o mair accoontability on the pairt o public bodies in their ettles tae uphaud and promote Gaelic answerin the set furth need for mair action across Scotland's public landscape in cairryin oot the commitments o Gaelic leid plans.
- 26. Section 9 inserts forby a new section 7A tae the 2005 Act allouin the Scots Ministers tae gie guidance tae relevant public authorities on Gaelic leid plans, and tae gie directions relatin tae the application o the staunards and requirements set oot in regulations unner section 2C(1) tae the preparation o the plan. This taks the place o the guidance pouers o Bòrd na Gàidhlig in section 8 o the 2005 Act, which is repealed.
- 27. Guidance on Gaelic leid plans is issued the noo by Bòrd na Gàidhlig. This chynge will mak siccar that the preparation o sic guidance follaes the mair usual practice o bein issued frae the level o Scots Ministers raither than a non-departmental public body. The direction-makkin pouer is thocht necessar in uphaudin oor hamelt minority leids in the event that there are circumstances whaur a direction is necessar tae win tae a national policy aim or tae uphaud a body tae tak the action it is settin oot tae tak.

Land richts and responsibilities statement: regaird tae be had tae uphaudin Gaelic

28. Unner section 1 o the Land Reform (Scotland) Act 2016, the Scots Ministers maun devise and furthset a land richts and responsibilities statement: a statement o

principles for land richts and responsibilities in Scotland. Section 10 o the Bill adds the want for promotin, forderin and uphaudin the Gaelic leid tae the list o maitters that the Scots Ministers maun tak tent o in devisin the statement.

29. The concentration o muckle pairts o Gaelic spikkin Scotland in rural, island communities means that the questions o leid development and land uise are nearhaund tae yin anither. This is seen in the recent Report o the Short Life Wirkin Group on Economic and Social Opportunities for Gaelic. Amang its recommendations wis that landowners in designatit Gaelic communities should shaw and state their uphaudin o the leid athin their Land Richts and Responsibilities Statement. The sibness o land issues wi Gaelic revitalisation is seen forby in the wark duin by the Scots Government's Gaelic & Scots Division and Bòrd na Gàidhlig wi bodies sic as Community Land Scotland or sindry estate trusts. Tho it daesnae relate tae landowners' statements, this provision is a means o makkin siccar that Gaelic is ayeweys taen tent o in maitters relatin tae land use in Scotland.

### **Chapter 1: Ither approaches**

30. The manifesto commitments o 2021, includin the introduction o a Scots Languages Bill, were endorsed by Scots Ministers and athin this, ither approaches were thocht about in vital areas sic as leid status, Bòrd na Gàidhlig wirkins, Gaelic leid plans and areas o muckle linguistic mense. Thir hae been ootlined ablow.

### Leid status

31. Aw minority leids share a concern for profile and status in the countries and regions whaur they belang. As anither wey o includin a direct statement about status, the Scots Government considert that, tae an extent, the want for mair muckle status wad be satisfied by virtue o the provisions that are bein brocht forrit in this Bill. The Bill provisions will big a mair strang structure for thir leids and bring about kenspeckle improvements tae the uphaudin available tae them. Thir meisures will forby hae a positive impact on the status o the leid. Houaniver, in considerin consultation responses a strang wish has been taen tent o that, forby, a plain statement o leid status should be includit in the Bill as weel. This has noo been includit and wis supportit forby in discussions wi ither jurisdictions around minority leid policy.

### Bòrd na Gàidhlig

32. Ither approaches were thocht aboot for Bòrd na Gàidhlig and whaur it sat as regairds tae Government, includin agency status. Thon discussions concludit that there wis value in haein a public body, at airms-length tae government, and tae aye hae baith an uphaudin and bieldin role alang wi a monitorin function. Tho a Leid Commissioner is uised in ither countries, the context isnae the same. When Wales appyntit a Leid Commissioner the wark o the Welsh Leid Board stapped. In Scotland, as set oot abuin, there is aye a need for and value in haein a Gaelic public body wi promotional wirkins. As regairds tae this, the approach o a Leid Commissioner wis

thocht aboot, as wi Wales and Ireland, and this restructurin wisnae recommendit tae Scots Ministers.

33. As abuin, there is value in Bòrd na Gàidhlig aye haein an uphaudin and promotional role and jynin this up wi monitorin o Gaelic ongauns. Houaniver, steps hae been taen in the Bill that upbig the monitorin and reportin role o BnG tae mak siccar o better compliance wi Gaelic priorities and commitments.

### Areas o Muckle Linguistic Mense

- 34. In relation tae uphaudin o Gaelic, consideration wis gied tae the makkin o a Gàidhealtachd. This wad be a geographical area, mebbes alang the Irish model, whaur there wis a guid nummer o Gaelic spikkers and certain meisures for uphaudin the leid were expectit. For aw that the term Gàidhealtachd is weel-kent in Scotland as referrin historically tae the Hielands, it has never been a term that has been seen in a policy context.
- 35. Follaein consultation, discussions wi ither jurisdictions, and consideration o the Gaelic profile in Scotland, this approach didnae hae support as the principal model and policy tae tak forrit for this Bill. The mair persuasive message frae consultation and preferred policy priority wis that Gaelic wis a leid for aw o Scotland and an approach should be taen that uphaudit Gaelic baith in urban environments and in island communities. There is a guid amoont o Gaelic ongauns and lairnin in toons and cities. This inpits tae the hale darg o the uphaudin o Gaelic and there wadnae be muckle benefit in a narrae Gàidhealtachd policy that micht lowden the importance o this ongaun. The approach has been taen forrit that Gaelic should be uphaudit throughoot Scotland, but this forby has includit the possibility o a proportionate uphaudin, dependin on the profile o the leid in different areas.
- 36. Wi the takkin forrit o the phrase and norrie o areas o muckle linguistic mense, there wis ither options tae think aboot as regairds tae whaur the responsibility should lie for the cryin o sic areas. Alternatives, includin Scots Ministers and Bòrd na Gàidhlig, were considert and assessed and, follaein this assessment, the decision wis taen that the Bill provisions should place the duty o designation wi local authorities as they sit maist nearhaund tae the communities whaur this will hae an impact and they awready deliver services tae thir areas. Ither options, as set furth abuin, wadnae hae the same level o relationships wi the areas unner consideration.

### Gaelic leid plans

37. Ither approaches were considert forby for Gaelic leid plans and the National Gaelic Leid Plan. The Scots Government kens o some concerns about the effectiveness o Gaelic leid plans. There were consultation responses that taen the view that there isnae muckle value in the ongauns associatit wi Gaelic Leid Plans. At the same time, ither consultation responses wantit tae see mair strang commitments and better delivery in Gaelic leid plans. Gaelic leid plans are, houaniver, inbiggit tae Scots public life, they hae inpittit tae makkin forrit wi progress wi Gaelic development, and the Scots Government assessment is that they should bide as is.

The National Gaelic Leid Plan will be replaced by a Gaelic leid strategy that will be devised by Scots Ministers and this Strategy will be vital tae the ongawin priorities and commitments set oot in Gaelic leid plans.

### **Chapter 1: Consultation**

38. The consultation didnae specifically speir aboot the official status o either Gaelic or Scots. Houaniver, the consultation paper did state that the Scots Languages Bill wad take "mair steps tae uphaud Gaelic, act on the Scots leid and tak tent o the fact that Scotland is a multilingual society." Responses received tae the consultation, maistly frae sindry fowk frae the spikker community, kythed a howp that Gaelic wad be gied official recognition athin Scotland. This wis thocht o as a meisure that wad add tae the prestige o the leid and gie mair wecht tae practical ettles on its behauf. Thon pynt o view wis pit forrit by ane respondent wha statit that sic a meisure wad heeze up Gaelic's importance athort public life: "I dout a braw wey tae combat this wad be tae mak Gaelic an official leid o Scotland, tae gie it sib-like bieldin and education guarantees as Welsh has in Wales, and Irish in the Republic o Ireland. This wad heeze up forby the public perception surroondin its importance."

### Bòrd na Gàidhlig

- 39. The consultation speirt respondents tae gie their views on Bòrd na Gàidhlig's duties the noo, how thir could wirk better, and structural chynges tae the Bòrd that wad forder the promotion and uphaudin o Gaelic in Scotland.
- 40. The response tae the consultation shawed a desire for Bòrd na Gàidhlig tae hae mair influence in decisions regairdin the promotion o Gaelic. The muckler vyce and leverage the body will hae as a result o the Bill will gang some wey taewards meetin thon desire. Consultation responses took tent forby o the challenges faced by Bòrd na Gàidhlig through haein its resoorces sindert atween leid promotion, regulation and enforcement. Ane respondent statit that "Bord na Gaidhlig is ettlin tae dae ower muckle wi ower pickle. Gaelic leid plans tak up a wheen o resoorces and BnG isnae able tae act as polis tae them. There is a threap for anither body tae regulate plans and focus on this element." Thir comments were received maistly frae community groups and frae sindry fowk wi a leid interest and no sae muckle frae public authorities.
- 41. The Bill, by placin the duty for regulation on Scots Ministers and lattin Bòrd na Gàidhlig focus on promotion and enforcement, will inpit taewards a mair efficient wirkin method for the Bòrd. There are provisions that hae the potential tae lessen the warkload on BnG and thir include the Scots Ministers takkin responsibility for the Gaelic leid strategy and Gaelic leid staunards and includin the Scots Pairliament in compliance darg.

### Gaelic leid plans

42. Anither criticism that wis set oot by community groups wis the habit o bodies wirkin wi Gaelic leid plans tae operate in silos. It wis felt that a mair muckle emphasis on pairtnership wis necessar athort the public and private sectors. This criticism took

the view forby that Gaelic development should tak tent o the leid's sindry needs in different pairts o Scotland and different social sectors. The follaein response wis uisefu in kythin sindry aspects o a pynt o view set oot athort the consultation: "A new jynt pan-Hielands and Islands and a pan-Scotland programme o development activity should be creatit and cairried oot atween the Bòrd and ither development bodies tae mitigate against a 'silo' mentality gettin attached tae Gaelic development and recognisin that uphaudin in terms o the promotion and bieldin for Gaelic raxes ayont the remit o the Bòrd.". The combined initiatives o a Gaelic leid strategy, Gaelic leid staunards and areas o muckle linguistic mense will bring aboot this closer wirkin and co-operation wi a focus on the distinct needs o an area.

- 43. It could be threaped that the desire for a "pan-Hielands and Islands" and a "pan-Scotland programme" o Gaelic development is, tae some extent onywey, answered by existin programmes sic as the Scots Government's Convention o the Hielands and Islands and its Faster Rate o Progress initiative. At the same time, the Bill ettles tae mak mair o the ability o public bodies tae devise Gaelic policies suitit tae their geographical and professional remits through the issuin o staunards and guidance by Scots Ministers.
- 44. This will allou Bòrd na Gàidhlig, through its mair muckle monitorin role, tae gie a mair hale-heidit owerview o the Gaelic policy landscape and will allou better communication atween public bodies and be a means o sortin the "siloisation" o Gaelic development. Pittin a duty on public bodies tae eidently report tae Bòrd na Gàidhlig on the cairryin oot o their Gaelic leid plans is a meisure wi the aim o makkin siccar that ettles for Gaelic uphaudin are mair effectively taen by Scotland's public bodies liftin the burden placed on Bòrd na Gàidhlig the noo.
- 45. It wis important tae consultation respondents that Bòrd na Gàidhlig be a kenspeckle body in the promotion o Gaelic and ane that wis able tae haud ither bodies accoontable in their promotion o Gaelic. Ane response tae thon effect suggestit that Bòrd na Gàidhlig "seems as if it hasnae got muckle tae tell us. Makkin it mair strang... wad increase its valency and purpose." Makkin siccar that the Bòrd's Corporate Plan plainly ootlines its exercises and wirkins as regairds tae the Scots Ministers' Gaelic leid strategy will bring this aboot. As Bòrd na Gàidhlig is nae langer tae draw up a set o Gaelic priorities as afore in the National Gaelic Leid Plan, this provision maks possible a public statement o BnG priorities, and it maks the link wi the Gaelic leid strategy, and it forby gies oot a plain statement o whit ministers can expect o Bòrd na Gàidhlig.

#### A Gàidhealtachd

46. Unner the Gàidhealtachd manifesto commitment, the consultation speired respondents for their thochts on the meisures that should be in place tae uphaud Gaelic spikkers in areas wi a guid nummers o spikkers; how sic areas should be defined; and how sic meisures and definitions could be balanced wi the principle that Gaelic wis a national leid for aw o Scotland.

- 47. Some responses tae the consultation pit forrit a threap for mair targeted uphaudin for Gaelic, certes in island areas. The view wis pit forrit forby that this uphaudin should bring thegither ither social and economic issues, such as hoosin and employment, affectin the leid at community level. Houaniver, it wis strangly threaped forby that ony sic uphaudin shouldnae work against Gaelic's status as a national leid for aw Scots nor cause sinderins atween first and second leid Gaelic spikkers or atween spikkers bidin in island communities and the central belt.
- 48. The policy approach taen athin the areas o muckle linguistic mense provision has socht tae balance thir views. It has forby drawn on ither soorces sic as the recommendations o the Short Life Wirkin Group on Economic and Social Opportunities for Gaelic. This report was commissioned by Scots Ministers and uised the concept o Key Gaelic Communities as an important policy device for prioritisin certain Gaelic provision in the Hielands and Islands. The policy choice o areas o muckle linguistic mense raither than Gàidhealtachd or key Gaelic communities is due tae the ability o areas o muckle linguistic mense tae apply tae a braid range o areas, no jist areas o low population in the Hielands and Islands. This wis a recurrin pynt o criticism in the consultation responses.
- 49. The need for official Gaelic policy tae tak mair tent o community level forderin wis a common response athin the consultation especially as regairds the operations o Bòrd na Gàidhlig. Designatin areas o muckle linguistic mense sets oot a community framewark Gaelic leid plannin ongauns can tak place athin. Wi Gaelic development it has aye been taen tent o that a proportionate approach should be follaed as it is no likely that the same policy approach should be uised in, for example, Hieland Council and Scots Borders as regairds tae Gaelic.
- 50. This proportionate policy approach has aye been pairt o Gaelic promotion and forderin but never taen forrit as a formal policy approach. In takkin a lead frae the manifesto commitments and the consultation responses, this proportionate policy approach is bein incorporatit intae Gaelic development but no at the expense o the promotion o Gaelic throughoot Scotland.

# A Gaelic Leid Strategy

- 51. There wis a threap athin the consultation responses for a national Gaelic leid strategy that wad gie a mair cohesive approach tae leid development athort the country. This is a braidly held view amang Gaelic interests and has been continually set oot ower the last thirty years and mair. Consultation responses were developin the proposals tae set oot a national strategic approach tae Gaelic medium education and tae review the structures and wirkins o Bòrd na Gàidhlig. The plainest statement o this threap wis ane respondent's view that "A Scots Languages Bill maun deliver a national Gaelic leid strategy for the neist 25 years A plain vision for the leid tae catch the imagination o the public led at ministerial level wi Scots Government expectations gey plain."
- 52. Despite the lang-term ambition set oot in this particular response, a shorter timeframe has been maintained athin the Bill tae mak siccar o mair muckle flexibility

tae the strategy and allou it tae respond tae chyngin circumstances. The provision for a Gaelic leid strategy ettles tae satisfy some aspects o this threap – maist notably the need for the lang-term vision for Gaelic's development tae come frae the level and authority o Scots Ministers.

53. Houaniver, respondents took tent forby o Bòrd na Gàidhlig's expertise in Gaelic forderin and the braw wark duin by the body in promotin Gaelic in the educational sector. The University o Glesga, for example, in its response took tent o "the ootstaunin wark cairried oot by Bòrd na Gàidhlig by a relatively smaw body o eident and haird-wirkin fowk. They hae been an invaluable resoorce tae the University as we hae developed oor third Gaelic leid plan o late."

### A Leid Commissioner

- 54. Some responses tae the consultation threaped for a new post tae be makkit for a Leid Commissioner. Tae some extent this wad follae the example o sib-like offices in Wales and Ireland. This view wis shared by academic interests and community groups. Submissions on the topic were a mixter-maxter in their view as tae whether a Leid Commissioner should tak the place o or rin alangside the role o Bòrd na Gàidhlig. Sic a position wad hae pouers tae monitor the compliance o public bodies wi their duties tae uphaud Gaelic. This wad mak siccar o accoontability in haudin tae the national Gaelic leid strategy. Ither responses threaped for this role tae be taen on by Bòrd na Gàidhlig specifically as regairds tae Gaelic medium education.
- 55. The commissioner role is ane that wad allou the body tae act as an ombudsman, mediatin atween the national leid strategy and its cairryin oot by local authorities. The latter approach in the paragraph abuin is the ane pit forrit for the Bill in view o the operatin context in Scotland. Tho a commissioner has been set in place in ither countries, the context is different in Scotland. When Wales pit in place a Leid Commissioner the wark o the Welsh Leid Board stapped. In Scotland, as set oot in the paragraph 32 abuin, there is aye a need for and value in haein a Gaelic public body that has the function o promotin Gaelic and monitorin Gaelic ongauns forby.
- 56. It wis requestit that local authorities better promote and mak uise o Gaelic through their wirkins. Mair accoontability wis desired for the extent tae whit a national leid strategy and local leid plans are cairried oot by local authorities and how relevant siller is uised. Respondents threaped forby that sic directions maun come frae the ministerial level. Athin the Bill this is provided for by the placin o duties on relevant public authorities tae think aboot the promotion and uphaudin o Gaelic while makkin uise o their wirkins. This will be makkit mair o by the giein oot o guidance and directions by Scots Ministers on the duty o public bodies taewards Gaelic.
- 57. Forby the burden o duties taen on the noo by Bòrd na Gàidhlig, a need wis pyntit oot for mair context specific Gaelic leids plans fit for the needs o sindry authorities. This could be brung aboot by Scots Ministers takkin on the guidance role haudit the noo by Bòrd na Gàidhlig. Scots Ministers could then direct authorities in the particular staunards they maun meet athin their Gaelic leid plans, wi regaird tae whit

context the plans are bein cairried oot in. As abuin, this will be fordered by the issuin o guidance and direction by Scots Ministers.

58. The Bill provisions hae been shaped by feedback ayont the formal consultation. Tae the fore here has been the Report o the Short Life Wirkin Group on Economic and Social Opportunities for Gaelic. Amang its recommendations wis for landowners tae "shaw and state how they uphaud the leid in their Land Richts and Responsibilities statement". In particular, it wis threaped that they should gie evidence o projects and initiatives that deliver social and economic ootcomes for Gaelic. While it daesnae relate tae landowners, section 10 o the Bill gangs some wey taewards addressin this desire for Gaelic tae be taen tent o athin issues o land uise in Scotland.

### **Chapter Two: Education**

Duty o Scots Ministers tae promote and uphaud Gaelic education

- 59. Section 11 o the Bill inserts a new section 6A intae the 2016 Act. This imposes a duty on the Scots Ministers tae promote and uphaud the provision in schuils o Gaelic lairner education and Gaelic medium education and the teachin o the Gaelic leid in the provision o faurer education by education authorities.
- 60. Gaelic medium and Gaelic lairner education hae makkit muckle strides through the ettles o local authorities. This will be makkit mair o wi the new national strategic approach that this Bill will pit in place. A duty will be pit upon Scots Ministers tae promote, forder and uphaud the provision o Gaelic lairner education, Gaelic medium education in schuils and the teachin o the Gaelic leid in an Education Authorities provision o faurer education. This duty on the Scots Ministers will combine wi and big upon the sindry ettles o education authorities as pairt o the national leid strategy and will forby help local authorities address the challenges they face the noo in their provision o Gaelic medium, lairner and faurer education.

# Pouer for Scots Ministers tae set staunards for Gaelic education in schuils

- 61. Section 12 o the Bill inserts a new section 6B intae the 2016 Act. This gies the Scots Ministers pouer tae mak regulations tae set oot the staunards and requirements that an education authority maun conform tae in makkin uise o its wirkins as regairds tae Gaelic lairner education, Gaelic medium education and teachin o Gaelic in its provision o faurer education.
- 62. In devisin regulations, the Scots Ministers maun speir at the sindry interest pairties set oot in subsection (4). Regulations micht mak different provision for different aims and different areas (includin different pairts o an education authority's area) and are subject tae the negative procedure. Tho guid progress has been seen in Gaelic education, the provision o staunards will address a nummer o the issues that are aye viewed as obstacles in Gaelic medium education and will mak plain tae parents whit can be expectit when a young person stairts Gaelic medium education. Braidly, the issues that wad be thocht o as areas that need tae be addressed in

GME/GLE include the follaein. GME ingang tae provision and local authority promotion o GME, GME as a 3-18 experience and GME continuity, GME subject choice, curriculum and assessment arrangements, GME teacher recruitment, placement, retention and professional lairnin, Teacher and pupil support and resoorces, O-3, early years provision and linguistic acquisition, Cless sizes, leid assistants, immersion and fluency, Takkin account o GME when settin national expectations, Inclusion o GME in the plannin for and reportin by schuils where GME is available, Gaelic lairner education at aw levels and settin oot how national bodies and agencies can better wirk thegither tae uphaud GME and GLE. Some o thir hae been includit in the Statutory Guidance on Gaelic education and will be addressed forby in Staunards and Strategy.

# Guidance tae public authorities on Gaelic education

- 63. Section 13 o the Bill inserts a new section 6C intae the 2016 Act, giein the Scots Ministers a pouer tae gie guidance tae relevant public authorities (as set oot in subsection (5), tae be consistent wi the definition in the 2005 Act) in relation tae the provision o Gaelic lairner education and Gaelic medium education. The provision o guidance will help wi mair detail on the cairryin-oot o thir provisions and Scots Ministers maun speir at interestit pairties in devisin the guidance.
- 64. Statutory guidance is awready in place for Gaelic education. Houaniver, whit the Bill chynges is the author o the guidance wi Scots Ministers takkin on the pouer haudit the noo by Bòrd na Gàidhlig. This will follae the mair usual process for statutory guidance bein issued by Scots Ministers raither than an NDPB. This will allou statutory guidance tae tak account o advice and practical expertise frae a range o areas and tae keep pace wi chynges in braider policy areas.

### Directions tae education authorities about Gaelic education

- 65. Section 14 o the Bill inserts a new section 6D intae the 2016 Act, giein pouer tae the Scots Ministers tae gie directions tae education authorities about the performance o their wirkins unner Pairt 2 o the 2016 Act relatin tae Gaelic lairner education and Gaelic medium education.
- 66. While the delivery o education is for local authorities, in a minority sector sic as Gaelic medium education, there micht be circumstances whaur recoorse tae a direction pouer is uisefu or necessar tae win tae a national policy aim or uphaud certain action.

### General duty tae provide education includes Gaelic education

67. Section 15 o the Bill chynges the Education (Scotland) Act 1980 sae as tae mak it plain that an education authority's duty tae siccar the provision o guid-eneuch and efficient schuil education for the authority's area micht include Gaelic lairner education and Gaelic medium education. This nae langer applies anely in Gaelic spikkin areas. Forby, the teachin o the Gaelic leid as pairt o an education authority's duty tae provide faurer education nae langer applies anely in Gaelic spikkin areas. This provision maks a chynge that is vital forby for the status o Gaelic.

68. This section taks tent o the fact that the geography o Scotland's Gaelic spikkin communities has chynged a guid deal syne the Education (Scotland) Act 1980. The Gaelic spikkin population is noo sindert awmaist hauf-and-hauf atween the traditional Gaelic spikkin areas athin Comhairle nan Eilean Siar, Hieland Cooncil and Argyll & Bute Cooncil and the Gaelic communities o Glesga City Cooncil and Embra City Cooncil, amang ither local authorities. The latter areas mak up forby some o the leid's areas o maist muckle growth and the ability tae hae ingang tae ilka form o Gaelic education athin them is vital tae its sustainability. This provision inpits tae the aim o braidenin the areas whaur Gaelic is considert.

# Duty tae promote Gaelic education in makkin uise o wirkins unner the Education (Scotland) Act 1980

69. Section 16 o the Bill inserts a new section 14A intae the 2016 Act. In makkin uise o its wirkins unner the Education (Scotland) Act 1980, an education authority maun promote and uphaud Gaelic lairner education and Gaelic medium education and tak tent o the needs and interests o pupils and wad-be pupils.

### Information-sharin about Gaelic education

70. Section 17 o the Bill inserts a new section 16A intae the 2016 Act. This allous Bòrd na Gàidhlig tae serve a notice on an education authority makkin it necessar for it tae provide information aboot Gaelic lairner education, Gaelic medium education or the teachin o Gaelic in its provision o faurer education. This provision is necessar for the darg that Bòrd na Gàidhlig has o reportin on compliance and an education authority maun comply wi the notice.

### Gaelic education delivery plannin

71. Section 18 chynges section 3 o the 2005 Act that sets oot the requirements for Gaelic leid plans. Whaur the authority devisin the plan is an education authority, the plan maun set oot the authority's plan for the provision o Gaelic education, and the authority maun speir at interestit bodies on thon elements o the plan. The pouer for the Scots Ministers tae mak regulations aboot the content o Gaelic leid plans is stentit tae allou for mair provision aboot the maitters that maun be includit. The Gaelic leid plans o education authorities will be makkit mair strang by plainer specifics as tae the delivery o Gaelic medium education and Gaelic lairner education should be luikt at as pairt o the Gaelic leid plannin process.

### Duty tae uphaud ingang tae Gaelic medium education

72. Section 19 chynges section 15 o the 2016 Act tae place an education authority unner a duty tae uphaud a bairn wha bides in its area tae hae ingang tae Gaelic medium education providit in the area o anither education authority, sae faur as reasonably practicable. This applies baith whaur the hame authority daesnae provide Gaelic medium education, and whaur it daes but it's no reasonably practicable for the bairn tae hae ingang tae it access it (for example, because it's ower faur tae traivel). The ither approach wad be that the young person in sic-and-sic a location or

situation wadnae be able tae hae ingang tae Gaelic education and this approach wadnae allou a young person tae siccar GME provision.

# Duty tae set oot a catchment area for schuils providin Gaelic medium education

73. Section 20 inserts a new section 15A intae the 2016 Act, makkin it necessar for an education authority tae set oot a catchment area for Gaelic medium schuils unner its management. For ayebidin provision, this maun be duin athin 2 years o this section comin intae force. The catchment area micht, but needna, be the same as for ither schuils, or for ony English medium education at the same schuil. In settin oot a catchment area, the education authority maun tak account o the need tae provide reasonable traivel arrangements.

74. Gaelic medium education is a minority sector athin the Scots schuil system and ane whase needs dinnae map straicht ontae thon o that braider system. In the case o catchment areas, specific accommodation has tae be makkit for Gaelic medium schuils or units aft bein the anely facilities o their kind athin a local authority. Whiles they are the anely yins athin several local authorities. Gaelic medium schuils or units sicweys require catchment areas that match their sindry needs. The Guidance on Gaelic education deals wi this issue and there is provision in the Bill. The expectation in the Guidance is that a GME catchment 'lays ower' a nummer o, eg, primary catchment areas, tae forder ingang and because the GME provision micht be the anely GME provision in the area or authority. The ither approach wisnae ane that wis gied serious thocht tae. The ither approach wad be that that GME catchment wis the same as the EME catchment at the same schuil and this wad hae the potential tae wirk against uphaudin GME uptake. The provisions o the Bill big upon the provisions o the 2017 Statutory Guidance.

# Application o Schuils (Consultation) (Scotland) Act 2010 tae transport tae Gaelic medium education

75. Section 21 adds a proposal tae gie ower wi arrangements for transport for pupils in Gaelic medium education tae schedule 1 o the Schuils (Consultation) (Scotland) Act 2010, wi the effect that an education authority will hae tae follae the process set oot in thon Act for ony sic relevant proposal. New paragraph 7A insertit intae schedule 2 gies the list o relevant consultees for sic a relevant proposal, and the substitution o paragraph 11 means that Comann nam Parant (Naiseanta) will forby be a relevant consultee for aw proposals affectin Gaelic medium education.

Assessments: pouer tae mak different provision for different areas

76. Section 22 chynges the 2016 Act sae that the pouer in section 9(7) tae chynge the nummer o bairns that will trigger the requirement for a full assessment o Gaelic medium primary education provision can apply tae different areas athin an education authority's area.

### Extension o assessments tae early lairnin and care o bairns

- 77. Section 23 chynges the 2016 Act wi the effect that the process set oot for the assessment o Gaelic medium primary education will apply as weel tae early lairnin and care o bairns.
- 78. Primary education in Gaelic medium is providit through total immersion lairnin whaur a bairn is taucht halely through the medium o Gaelic, tae mak siccar o haleheidit fluency in the leid. At the ootset o Gaelic medium education in Scotland, this wis a method adaptit frae the teachin o minority leids in ither pairts. The full phase o total immersion is meant tae stairt durin early lairnin and care o bairns helpin the bairn tae be halely ready for formal schuilin in the relevant leid. The process the noo for assessin the need for Gaelic medium education athin a local authority daesnae guarantee the provision o Gaelic early lairnin and care o bairns. This leads tae shortcomins athin the schuil system that hae an unfair impact on the lairnin experience o pupils and the wark burdens o teachers. Makkin siccar that early lairnin and care o bairns will be thocht o as pairt o the same provision as primary education in Gaelic will lead tae a mair effective system o schuilin.

Duty tae consult and plan on delivery o early lairnin and care o bairns

79. Section 24 chynges section 50 o the Bairns and Young Fowk (Scotland) Act 2014 sae that it is necessar for an education authority tae consult on whether it should mak Gaelic medium early lairnin and care o bairns available.

Conditions o grants tae the Scots Faurer and Hie-er Education Fundin Cooncil

80. Section 25 chynges the Faurer and Hie-er Education (Scotland) Act 2005 tae insert a new section 9E. Section 9 o the Faurer and Hie-er Education (Scotland) Act 2005 allous the Scots Ministers tae mak grants tae the Scots Faurer and Hie-er Education Cooncil subject tae sic terms and conditions as the Scots Ministers jalouse fit. New section 9E provides that the Scots Ministers micht impose terms and conditions for the purpose o enablin, forderin or increasin participation in fundable faurer education and fundable hie-er education in the Gaelic leid and in Gaelic culture.

### **Chapter 2: Ither approaches**

81. The Scots Government has a stieve commitment tae maintain Gaelic medium education (GME) in Scots schuils. Tho there were views offered on Gaelic medium education, the nature o Gaelic medium education in schuils and the uphaudin in place, the Scots Government daesnae want tae mak muckle chynges tae the core structure and delivery model for GME in Scots schuils. Gaelic medium education and Gaelic lairner education will aye be delivered by local authorities and wi important uphaudin frae baith the Scots Government and a range o public bodies. The Scots Government, houaniver, kens that Gaelic education interests and particularly parental groups are gleg tae see progress wi Gaelic medium education and for a range o concerns tae be addressed. As a result o familiarity wi the sector, the Scots Government kens that Gaelic education interests hae had a focus on a nummer o issues sic as ingang tae Gaelic medium education, early years provision and

immersion in primary schuils, teacher recruitment and uphaudin, resources for Gaelic education and secondary provision. The Gaelic education sector or braider Gaelic community is regularly consultit on views on Gaelic plans, National Plans, OECD proposals, cultural strategies, community maitters and a hale wheen o Scots Government, pairliamentary, public body and local authority consultations. Forby, inpit is providit in official meetins wi Gaelic interests and in ministerial consultation exercises.

- 82. In the section abuin, the main ither approaches that hae been considert hae been ootlined. There are ither provisions in the Bill that didnae need the same level o assessment o ither approaches. This wis maistly because the ither approach tae be thocht aboot wadnae hae presentit a credible gate tae cairryin oot the oweraw policy or deliverin the manifesto commitment. This wad include issues sic as the promotion o GME, the adoption o GME catchment areas and uphaudin for traivel tae GME schuils. As regairds tae thir provisions, the ither approach wad be tae no draw up GME catchment areas and tae no uphaud traivel tae GME provision. Thir ither approaches didnae receive consideration as they fell ootside the oweraw policy objective o uphaudin Scotland's hamelt leids.
- 83. In view o this an approach has been taen forrit that brings thegither key chynges tae current Gaelic education legislation wi pouer tae mak regulations tae set staunards. Tho anither approach hasnae been considert tae the delivery o Gaelic education in Scots schuils, a braid range o chynges were considert tae respond tae the messages in the consultation. This includit a nummer o chynges that hinnae been follaed up on, sic as provision for stairtin up staun-alane Gaelic schuils or makkin simpler the process whaur parents can speir for Gaelic medium education for their bairns. Thir issues will be dealt wi through the Gaelic leid strategy and staunards.

### **Chapter 2: Consultation**

- 84. The follaein themes came oot o the consultation responses on Gaelic medium education.
- There is a need for mair fundin and resoorces.
- Barriers that hinder the growth and promotion o GME need tae be addressed.
- Ingang tae GME needs tae be improved.
- Continuous provisions atween early years, primary, and secondary needs tae be guaranteed.
- Mair staun-alane GME schuils are needit.
- GME teachers need mair uphaudin.
- There maun be mair duties on local authorities tae promote and uphaud GME.
- For Gaelic lairner education (GLE), there wis a desire for better ingang tae it throughoot the schuil system and for mair bairns in GLE tae hae opportunities tae

- gang intae GME ayont P1. There wis a desire forby for GME and GLE tae be no as muckle o a discretionary choice for local authorities and for its provision and uphaudin tae hae mair direction frae the level o Scots Ministers.
- 85. The system the noo, whaur GME is at the discretion o local authorities, contains gaps in provision atween different stages o schuil early years, primary and secondary. Forby, it contains gaps in resources atween GME and English medium education in terms o basic lairnin materials as weel as additional lairnin uphaudin. This was a common topic in the responses o sindry parents and parent groups. Regulations devised by ministers, in consultation wi interestit pairties, were viewed as a means o makkin siccar o basic levels o GME provision that an education authority maun meet.
- 86. The burden o duties upon Bòrd na Gàidhlig wis forby a feature o consultation responses on the subject o GME and GLE. While respondents were braidly appreciative o Bòrd na Gàidhlig's ettles in giein guidance tae parents and local authorities on Gaelic schuil provision, mony were o the view that it wad wirk better in a monitorin role, wi Scots Ministers giein direction in the stairtin-up o GME and GLE.
- 87. Respondents statit their scunneration at how haird it is tae airt oot information aboot GME and GLE provision athin their local authorities. It wis threaped that local authorities should hae a duty tae be mair eident in advertisin the GME and GLE opportunities that were oot there. This tied in wi a desire for the authorities tae pynt oot the benefits o bilingual education. Respondents threaped forby for a duty on local authorities tae mak siccar parents frae non-Gaelic spikkin backgrunds kent aboot the opportunities for GME. It wis requestit as weel that local authorities should hae tae continually assess the demand athin their areas for Gaelic education.
- 88. A want o transport options tae GME schuils or units wis pyntit oot as a barrier for bairns either stairtin primary GME or howpin tae haud forrit wi GME in secondary schuil. Sic transport is providit by some local authorities when their ain GME centres are a bittie awa frae a bairn's residence or when the bairn maun hae ingang tae secondary GME in anither local authority. Houaniver, it's no guaranteed. Sicweys, a mair muckle statutory obligation for local authorities tae provide this service as pairt o their GME provision wis pit forrit as ane o the barriers that had tae be owercome.
- 89. Hereaboots and thereaboots, the inclusion o GME in local authority catchment reviews wis named as a factor that hindert pupils' ingang tae Gaelic schuilin. Ane respondent threaped that "unnertakkin mixed GME/EME catchment reviews" wis "discriminatory" against GME on account o GME pupils usually anely haein a choice o ane schuil in their area. This had the consequence o hinderin potential GME families frae this educational gate.
- 90. The importance o Comann nam Pàrant tae the braider development o Gaelic provision wis taen tent o on account o its role as the specific parent council for GME. Sicweys, it wis threaped that it should have a role as a statutory consultee unner schedule 2 o the Schuils (Consultation) (Scotland) Act 2010.

91. Early lairnin and care o bairns wis pyntit oot as a distinct sector o GME that needit mair uphaudin. Responses frae parents and schuilteachers remairked upon the challenges faced by bairns stairtin primary GME wi nae early years experience o Gaelic. There wis a demand for early years and care o bairns provision tae form pairt o the process for braid GME provision athin the 2016 Act.

### Part 2: Scots

- 92. As wi Gaelic, the policy objective o this Bill is tae provide mair uphaudin for the Scots leid and heeze up its status, profile and uise baith in public life and in community life. The Scots Government has aye taen tent o the fact that the Scots leid is a vital pairt o Scotland's heritage and national identity. The Scots Government has taen tent forby that the Scots leid is a vital pairt o Scotland's distinctive cultural life and has had muckle influence on oor sang, poetry and literature. Scots is vital as weel tae faimily and community life. In recognition o this the Scots Government devised a Scots leid policy in 2015 and has wirked closely wi education and cultural bodies tae forder this uphaudin for Scots.
- 93. The Scots leid, tho sib-like tae Ulster-Scots, is spikken anely athin Scotland. Sicweys, steps hae been taen athin Scotland, tae mak siccar o its uise and promotion. The 2011 Census kythed that mair than 1.5 million fowk cawed theirsels Scots spikkers. The Scots Government supports as weel the application o the provisions o The Cooncil o Europe's Charter on Regional or Minority Leids.
- 94. The Scots provisions in this Charter include the unnertakkins that policies should be based on recognition o the regional or minority leids as an expression o cultural wealth and include forby the need for strang action tae uphaud regional and minority leids. The unnertakkins include as weel the forderin and uphaudin o the uise o Scots in speech and scrievin; in public and private life and the provision o fit forms and means for the teachin and study o Scots. The Scots Government is committit tae big upon this and tak mair steps tae uphaud Scots through the provisions o the Scots Languages Bill.

# Chapter 1: Uphaudin o the Scots leid

Status o the Scots leid

95. Section 26 provides for the status o the Gaelic leid. The statement in subsection (1) that the Scots leid has official status athin Scotland is gied legal effect by the provision o the Bill conferrin wirkins on the Scots Ministers and ither bodies. This is the first time that legislation has makkit a statement about the status o the Scots leid. The official nature o Scots has aft been taen tent o in non-legal documents and in ministerial statements but no in legislation. Scots has been taen tent o in the Cooncil o Europe for Regional and Minority Leids and in proceedins o the British-Irish Cooncil. This step will gie a haund wi addressin the negative views that are at times attached tae Scots and the stigma and discrimination that Scots spikkers aft refer tae.

### Scots leid strategy

96. Section 27 maks it necessar for the Scots Ministers tae devise a Scots leid strategy. The section sets oot the necessar content o the Scots leid strategy, consultation and furthsettin requirements and timescales for its preparation and review and revision. The Scots Government, alang wi a nummer o ither public authorities, has a Scots policy wi priorities for the leid. The provisions in the Bill tae prepare a Scots strategy will add importance tae thir priorities and tae the wark bein duin by Scots bodies and ither authorities tae haud forrit wi thir priorities.

### Reportin on strategy

97. Section 28 maks it necessar for the Scots Ministers tae report on the strategy as suin as reasonably practicable efter the end o the period o 5 years frae when the strategy wis furthset last. This report will gie additional prestige and status for the Scots leid strategy and will help wi kythin progress wi the priorities set oot in the strategy and whaur mair action or uphaudin is necessar.

### Effect o strategy

98. Section 29 maks it necessar that the Scots Ministers maun tak tent o the strategy when makkin policies and makkin uise o their wirkins, and that a relevant public authority maun tak tent o it in makkin uise o its wirkins. Subsection (3) sets oot whit maks a relevant public authority, consistent wi the definition in section 10 o the 2005 Act. There are a nummer o Scots bodies that are active in areas sic as education, furthsettin, media and the airts. There is forby guid support frae some public authorities. The effect o the strategy will mak siccar Scots is mair tae the fore in Scots public and community life.

### Pouer for Scots Ministers tae gie guidance

99. Section 30 gies the Scots Ministers a pouer tae gie guidance tae relevant public authorities as regairds tae promotin and uphaudin the uise o the Scots leid and developin and encouragin Scots culture. The Scots Ministers maun speir at interestit bodies in devisin the guidance. Sic bodies micht include the likes o the Scots Language Centre, Scots Hoose and Yaldi Books. This will mak mair o the provisions that are in place for Scots and gie additional role and profile tae a nummer o Scots bodies.

### **Chapter 1: Ither approaches**

100. The provisions o this Bill seek tae heeze up the profile o Scots in a nummer o sectors in Scots public life. The Scots Government kens that there are some members o the spikker community that wantit tae see a public body set up for tae haud forrit wi Scots priorities. Thocht wis gien tae this as anither approach, but this hasnae been follaed up on in the Bill provisions. There are a nummer o smaw Scots bodies wirkin wi uphaudin frae the Scots Government. Thir bodies hae a wheen o expertise and guid community links and sicweys will be weel placed tae uphaud and tak forrit the provisions o this Bill. The Scots bodies forby hae guid wirkin relations wi Scots public authorities in relation tae the uphaudin o Scots.

101. This netwark o Scots bodies and public authorities is a strang found tae takkin forrit the next important steps tae promote and uphaud Scots. The approach taen forrit taks the view that the meisures includit are the richt steps jist noo and will bring about kenspeckle improvements for Scots provision. Forby, there are a nummer o smaw Scots bodies active in this area and the provisions o this Bill will mak mair o the role and status o thir bodies.

### **Chapter 1: Consultation**

102. The consultation exercise o 2022 speired questions forby about Scots. The key themes that cam oot o the responses included improvement o Scots education provision and wi the threap for better resources, recognition and accreditation. Better fundin and legislative uphaudin for Scots featured forby in the consultation responses, alang wi the promotion o Scots and that social stigmas as regairds tae Scots should be dinged doon. There wis as weel a wish tae see and hear mair Scots in the media and better visibility and resources for Scots. The need for a Scots strategy, uphaudin for Scots bodies and community engagement featured forby in the consultation exercise.

103. In consultation, views were received aboot the stairtin up o a Scots Leid Board tae promote the Scots Leid and this went thegither wi the threap for legislation and statutory provisions tae promote the leid. Some respondin thocht there wis a want o awaurness aboot the wark o Scots bodies that needit mair visibility and influence. It wis thocht that the Scots Languages Bill should gie legal and official recognition o Scots as an official minority leid in Scotland and initiatives tae gie the leid mair visibility should be uphaudit.

104. Fundin featured as weel in consultation responses for the purpose o developin and promotin ony projects or policies aboot the Scots leid. Some consultation responses proposed forby that the Scots Government should gie fundin for cultural aspects o Scots, includin fundin for films, braidcastin, media, and ither airt forms. Ony promotion o Scots maun mak siccar that it is inclusive and daesnae entrench negative stereotypes. There should be mair opportunities for engagement athin local communities tae mak siccar o stakehauder involvement.

# **Chapter 2: Schuil education**

#### Scots leid education in schuils

105. Section 31 maks it necessar for the Scots Ministers tae promote and uphaud Scots leid education in schuils. An education authority maun forby promote and uphaud Scots leid education in the schuils unner its management. This is respondin tae key messages in the consultation.

### Guidance on Scots leid education

106. Section 32 gies the Scots Ministers a pouer tae gie guidance tae education authorities aboot Scots leid education in schuils. The Scots Ministers maun speir at interestit bodies in devisin the guidance. Sic bodies micht include the likes o the

Scots Language Centre, Scots Hoose and Yaldi Books. Again, this provision is respondin tae key messages o the consultation.

### Pouer for Ministers tae set staunards for Scots leid education in schuils

107. Section 33 gies the Scots Ministers pouer tae mak regulations tae set oot the staunards and requirements that an education authority maun conform tae in makkin uise o its wirkins as regairds tae Scots leid education in the schuils unner its management. Regulations micht mak different provision for different aims and different areas (includin different pairts o an education authority's area). Regulations are subject tae the negative procedure.

### Reportin on Scots leid education

108. Section 34 maks it necessar for the Scots Ministers tae mak siccar o the provision o reports (likesay frae a third pairty provider) settin oot the forderin forrit makkit in the delivery o Scots leid education in schuils.

### Interpretation o Chapter 2

109. Section 35 imports defined terms frae the Education (Scotland) Act 1980 for the purposes o this Chapter.

### **Chapter 2: Ither approaches**

- 110. There are a nummer o smaw Scots bodies wirkin wi uphaudin frae the Scots Government. Thir bodies hae a wheen o educational expertise and guid community links and as a result will be weel placed tae uphaud and tak forrit the Scots education provisions o this Bill. The Scots bodies hae guid wirkin relations forby wi Scots public authorities as regairds tae uphaudin o Scots education.
- 111. This netwark o Scots bodies and public authorities is a strang found tae tak forrit the next vital steps tae promote and uphaud Scots education. The approach taen forrit taks the view that the meisures includit are the richt steps jist noo and will result in kenspeckle improvements for Scots education provision. Forby, there are a nummer o smaw Scots bodies giein Scots education uphaudin and the provisions o this Bill will mak mair o the role and status o thir bodies.

### **Chapter 2: Consultation**

- 112. There wis support for the Scots leid tae be mair integrated intae the education system. Some respondin wantit tae see better ingang tae and uphaudin o Scots leid in education and for the recognition and certification o fluent Scots spikkers and uphaudin the retention o Scots-spikkin teachers at primary and secondary levels throughoot Scotland. There wis support in consultation forby for Scots tae hae mair profile in Scots universities whaur lairners can follae the study o Scots in-depth and at tertiary level.
- 113. There were grammar and orthography comments forby and Scots bodies and authorities should think about staunardisin the Scots leid. The howp was pit forrit that

ony staunardised spellin, grammar and dictionary should follae recognisable conventions and historic precedents whilst accommodatin aw byleids. A staunard orthography o the Scots leid wis claimed tae be necessar tae heezin up the status o the leid and improvin its practicality o communication and education. The howp wis expressed forby that the Scots Government should set up a leid plannin board o experts tae research, discuss and pit in place an agreed staunardised orthography and grammar for the Scots leid.

## Part 3: Final provisions

### Commencement

114. Section 37 provides for Pairt 3 o the Bill tae come intae force on the day efter Royal Assent.

115. Aw ither provisions o the Bill are tae come intae force on a day appynted by regulations makkit by the Scots Ministers. Thir regulations micht mak transitional, transitory or savin provision relatit tae commencement and micht mak different provision for different aims (includin different pairts o the area o an education authority). It is, forby, necessar that thir regulations are pit afore the Pairliament unner section 30 o the Interpretation and Legislative Reform (Scotland) Act 2010, but they arenae in ither weys subject tae ony Pairliamentary procedure.

# Effects on equal opportunities, human richts, island communities, local government, sustainable development etc.

# Equal opportunities

116. The provisions o the Bill will uphaud and mak mair strang the ambition that equal opportunities should feature as a vital element o Scots public and cultural life. First o aw, the provisions that this Bill will uphaud and pit in place are open tae aw and there will be nae bodies or communities that are excludit. This is true jist noo o the main elements o Gaelic and Scots provision, education, airts, media, Gaelic lairnin and this will haud forrit intae the future. At the same time equal opportunities in Scotland will be an emphasis o this Bill as it will be makkin provision for spikker communities in Scotland that at times in the past hae been marginalised and provision has been wantin for thir communities.

### Human richts

117. Uphaudin o human richts covers a nummer o areas o social and political ongauns. Strang uphaudin o human richts can be fund in the statements o institutions sic as the UN, the Cooncil o Europe and forby in the statements o national pairliaments. The richt tae lairn and express yersel in a leid o preference aft

features in areas o ongauns includit in a list o human richts. As sic, this Bill will inpit tae takkin tent o leid and cultural richts and at the same time the provisions o this Bill willnae meddle wi or deny the human richts o ither citizens. This Bill is consistent wi and uphauds the UN Convention o the Richts o the Bairn and wi the requirements o the ECHR.

### Island communities

118. This Bill will forby gie vital uphaudin tae island communities. The Bill will aim tae stairt up areas o muckle linguistic mense for Gaelic whaur, amang ither areas, it is taen tent o that there are island areas wi muckle Gaelic spikkin communities. In the same wey, the Scots provisions o this Bill will inpit tae uphaudin o the leid whaur it is tae the fore in island communities.

### Local government

119. A nummer o local authorities hae important provision in place for Gaelic, decisions on this provision are taen locally and there is forby a meisure o uphaudin frae the Scots Government and frae public authorities for this provision. This Bill will tak forrit provisions that will gie structure and uphaudin for the leid provision that local authorities hae in place. The provisions o this Bill place importance on local government and local decision makkin tae uphaud the Gaelic and Scots leids.

## Sustainable development

120. Gaelic and Scots bodies are committit tae meisures that promote economic development and dae sae in a wey that taks tent o resources and the environment. Gaelic brings a range o benefits tae areas o low population and seeks tae uphaud communities in thir areas.

# International opinions

121. Anither relevant concern is the question o how a country deals wi hamelt leid minorities that it's responsible for. A nummer o sic leids are locatit athin the British Isles and thir leid communities are aye in contact and luikin at comparative provision. This Bill will demonstrate tae ither minority leid communities that the Scots Ministers are takkin vital steps tae promote and uphaud Gaelic and Scots athin Scotland.

# Croun consent

122. It is the Scots Government's view that the Bill as introduced needsna Croun consent. Croun consent is needit, and maun be signified durin a Bill's passage, whaur the Bill impacts the Royal prerogative, the hereditary revenues o the Croun or the personal property or interests o the Sovereign, the Prince and Steward o Scotland or the Duke o Cornwall. The Scots Government's view is that this Bill daes nane o thir things.

123. For the soorce o the necessity for Croun consent, see paragraph 7 o schedule 3 o the Scotland Act 1998, and rule 9.11 o the Pairliament's Staundin Orders. For mair information about the considerations that gang intae decidin gin Croun consent is necessar for a Bill see Erskine May, the guide tae procedure in the UK Pairliament.

# Scots Languages Bill

\_\_\_\_

# **Policy Memorandum**

© Pairliamentary copyricht. Scots Pairliamentary Corporate Body

Information on the Scots Pairliament's copyricht policy can be fund on the wabsite - www.parliament.scot

Produced and furthset in Scotland by the Scots Pairliamentary Corporate Body.

Aw documents are available on the Scots Pairliament wabsite at: <a href="https://www.parliament.scot/documents">www.parliament.scot/documents</a>